

լրացումներ կատարելու մասին «2004 թվականի դեկտեմբերի 30-ի N 1927-Ն որոշումները և այլն (համաձայն՝ <https://www.arlis.am/> իրավական տեղեկատվական համակարգի):

Այսպիսով, հաշվի առնելով վերոգրյալը, հաշվեքննող խումբը հաշվեքննող ժամանակաշրջանում՝ 2017թ.-ի հունվարի 1-ից 2018թ.-ի սեպտեմբերի 30-ը, արձանագրել է հետևյալ խեղաթյուրումներն ու անհամապատասխանությունները՝

1. Տեսչական մարմինը չի իրականացրել իր իրավասությանը վերաբերող իրավական ակտերի նախագծերի մշակման, գործող իրավական ակտերում փոփոխությունների և համապատասխան մարմիններին ներկայացնելու իր պարտավորությունը, որը սահմանված է Կանոնադրության 14-րդ կետի 2-րդ ենթակետով և «Տեսչական մարմինների մասին» ՀՀ օրենքի 7-րդ հոդվածի 7-րդ կետի 1.1) ենթակետով:

Առաջարկություններ՝

Հաշվեքննության ընթացքում արձանագրված անհամապատասխանությունների կամ խեղաթյուրումների վերաբերյալ հաշվեքննության օբյեկտի ղեկավարությանը և այլ շահագրգիռ կողմերին ներկայացվում են հետևյալ առաջարկությունները՝

ՀՀ Տեսչական մարմին՝

1. Իր իրավասությանը վերաբերող իրավական ակտերի նախագծեր մշակելու, գործող իրավական ակտերում փոփոխություններ կատարելու և համապատասխան մարմիններին ներկայացնելու իր պարտավորությունը պատշաճ իրականացնել:

Հաշվեքննության օբյեկտների ղեկավարների պատասխաններ

Տեսչական մարմին՝

Տեսչական մարմնի կողմից ներկայացված առարկությունները և բացատրությունները էական առումներով որևէ հիմնավոր պարզաբանումներ չեն պարունակել, կրել են հիմնականում բացատրական բնույթ և հաշվեքննության խմբի կողմից չեն ընդունվել:

ՀՀ կրթության և գիտության նախարարություն՝

ՀՀ կրթության և գիտության նախարարության կողմից ներկայացված առարկությունները և բացատրությունները էական առումներով որևէ հիմնավոր պարզաբանումներ չեն պարունակել, կրել են հիմնականում բացատրական բնույթ և հաշվեքննության խմբի կողմից չեն ընդունվել:

VII. ԲԱՑԱՏՐԱԿԱՆ ԱՇԽԱՏԱՆՔՆԵՐԻ ԻՐԱԿԱՆԱՑՈՒՄԸ, ՏՆՏԵՍԱՎԱՐՈՂ ՍՈՒԲՅԵԿՏՆԵՐԻՆ ԻՐԵՆՑ ԻՐԱՎՈՒՆՔՆԵՐԻ և ՊԱՐՏԱԿԱՆՈՒԹՅՈՒՆՆԵՐԻ ՄԱՍԻՆ ՏԵՂԵԿԱՑՈՒՄԸ, ԻՐԱՎԱԿԱՆ, ՄԱՍՆԱԳԻՏԱԿԱՆ, ՄԵԹՈԴԱԿԱՆ ԱՋԱԿՑՈՒԹՅԱՆ ԱՊԱՀՈՎՈՒՄԸ և ԿԱՆԽԱՐԳԵԼԻՉ ԳՈՐԾՈՒՆԵՈՒԹՅՈՒՆԸ:

**Հաշեքննվող
ժամանակաշրջանում նշված
գործառույթը չի իրականացվել**

Կանոնադրության 10-րդ կետի 3-րդ ենթակետի համաձայն Տեսչական մարմնի լիազորություններից է նախադպրոցական կրթության, հանրակրթության, նախնական մասնագիտական (արհեստագործական) և

միջին մասնագիտական կրթության ոլորտներում ՀՀ օրենքների և դրանց համապատասխան ընդունված իրավական ակտերի դրույթների կիրառման վերաբերյալ բացատրական աշխատանքների իրականացումը, տնտեսավարող սուբյեկտներին իրենց իրավունքների և պարտականությունների մասին տեղեկացումը, իրավական, մասնագիտական, մեթոդական աջակցության ապահովումը և կանխարգելիչ գործունեությունը: Հարկ է նշել, որ Տեսչական մարմինն այդ գործառույթը չի իրականացրել հաշվեքննվող ժամանակաշրջանում, սակայն Տեսչական մարմնի խորհրդի 2018 թվականի հուլիսի 3-ի N 07-02-01 որոշմամբ հաստատված 2018 թվականի տարեկան գործունեության ծրագրով նախատեսված է իրականացնել Տեսչական մարմնի վերահսկման ոլորտներում կրթության բնագավառը կարգավորող իրավական ակտերի դրույթների կիրառման վերաբերյալ բացատրական աշխատանքների, խորհրդատվության իրականացման, կանխարգելիչ միջոցառումներ: *Այնուամենայնիվ, հաշվեքննվող ժամանակաշրջանում նշված գործառույթը չի իրականացվել:*

Այսպիսով, հաշվի առնելով վերոգրյալը, հաշվեքննող խումբը հաշվեքննող ժամանակաշրջանում՝ 2017թ.-ի հունվարի 1-ից 2018թ.-ի սեպտեմբերի 30-ը, արձանագրել է հետևյալ խեղաթյուրումներն ու անհամապատասխանությունները՝

1. Տեսչական մարմինը չի իրականացրել ՀՀ օրենքների և դրանց համապատասխան ընդունված իրավական ակտերի դրույթների կիրառման վերաբերյալ բացատրական աշխատանքների իրականացման, տնտեսավարող սուբյեկտներին իրենց իրավունքների և պարտականությունների մասին տեղեկացման, իրավական, մասնագիտական, մեթոդական աջակցության ապահովման և կանխարգելիչ գործունեության իր պարտավորությունը, ինչը չի համապատասխանում Կանոնադրության 10-րդ կետի 3-րդ ենթակետի դրույթների պահանջներին:

Առաջարկություններ՝

Հաշվեքննության ընթացքում արձանագրված անհամապատասխանությունների կամ խեղաթյուրումների վերաբերյալ հաշվեքննության օբյեկտի ղեկավարությանը և այլ շահագրգիռ կողմերին ներկայացվում են հետևյալ առաջարկությունները՝

ՀՀ Տեսչական մարմին՝

2. Պատշաճ իրականացնել ՀՀ օրենքների և դրանց համապատասխան ընդունված իրավական ակտերի դրույթների կիրառման վերաբերյալ բացատրական աշխատանքների իրականացման, տնտեսավարող սուբյեկտներին իրենց իրավունքների և պարտականությունների մասին տեղեկացման, իրավական, մասնագիտական, մեթոդական աջակցության ապահովման և կանխարգելիչ գործունեության իր պարտավորությունը:

Հաշվեքննության օբյեկտների ղեկավարների պատասխաններ

Տեսչական մարմին՝

Տեսչական մարմնի կողմից ներկայացված առարկությունները և բացատրությունները էական առումներով որևէ հիմնավոր պարզաբանումներ չեն պարունակել, կրել են հիմնականում բացատրական բնույթ և հաշվեքննության խմբի կողմից չեն ընդունվել:

ՀՀ կրթության և գիտության նախարարություն՝

ՀՀ կրթության և գիտության նախարարության կողմից ներկայացված առարկությունները և բացատրությունները էական առումներով որևէ հիմնավոր պարզաբանումներ չեն պարունակել, կրել են հիմնականում բացատրական բնույթ և հաշվեքննության խմբի կողմից չեն ընդունվել:

VIII. ՌԻՍԿԻ ՎՐԱ ՀԻՄՆՎԱԾ ՍՏՈՒԳՈՒՄՆԵՐԻ ՀԱՄԱԿԱՐԳ

«Տեսչական մարմինների մասին» ՀՀ օրենքի 4-րդ հոդվածի 1-ին մասի 6-րդ կետի համաձայն Տեսչական մարմինը ղեկավարվում է ռիսկայնության առաջնորդվելու սկզբունքով, այսինքն՝ ռեսուրսները նպատակաուղղում է դեպի այն ոլորտները և տնտեսավարող սուբյեկտները, որոնք առավել ռիսկային են:

Կնանոնադրության 10-րդ կետի 6-րդ ենթակետի համաձայն Տեսչական մարմնի լիազորություններից է վիճակագրական տվյալների հավաքման և վերլուծությունների, նախադպրոցական կրթության, հանրակրթության, նախնական մասնագիտական (արհեստագործական) և միջին մասնագիտական կրթության ոլորտներում գործող տնտեսավարող սուբյեկտների ռիսկերի գնահատման աշխատանքների իրականացումը և վերահսկողական ու հսկողական գործառնությունների նպատակադրումը դեպի առավել ռիսկային ոլորտներն ու տնտեսավարող սուբյեկտները: Ավելին, «Հայաստանի Հանրապետությունում ստուգումների կազմակերպման և անցկացման մասին» ՀՀ օրենքի 2.1-րդ հոդվածի 2-րդ մասի համաձայն տուգումները պլանավորելու նպատակով ստուգում իրականացնող մարմինը՝ հետազոտելով իր վերահսկման ոլորտը, մշակում է տվյալ ոլորտում տնտեսավարող սուբյեկտների գործունեության ռիսկայնության աստիճանը որոշող չափանիշները, որոնք պետք է ներառեն տնտեսավարող սուբյեկտի գործունեության ոլորտի ռիսկը և (կամ) տնտեսավարող սուբյեկտի անհատական ռիսկերի հանրագումարը:

Տեսչական մարմինը 2018թ. չի ունեցել ռիսկի վրա հիմնված ստուգումների մեթոդաբանություն

Տեսչական մարմինը 2018թ. չի ունեցել ռիսկի վրա հիմնված ստուգումների մեթոդաբանություն: Այն անհրաժեշտ է և ստուգումների տարեկան ծրագիր և գործունեության տարեկան ծրագիր կազմելու համար, քանի որ «Տեսչական մարմինների մասին» ՀՀ օրենքի 3-րդ հոդվածի 1-ին մասի 1-ին կետի 1.3-րդ ենթակետի համաձայն գործունեության տարեկան ծրագիրը ներառում է նաև առկա խնդիրներն ու բացահայտված ռիսկերը:

Ստուգումների և գործունեության տարեկան ծրագրերը կազմվել են օգտագործելով արդեն իսկ գոյություն չունեցող մարմնի ռիսկի վրա հիմնված ստուգումների մեթոդաբանությունը

Սակայն, ռիսկի վրա հիմնված ստուգումների մեթոդաբանությունը և ռիսկայնությունը որոշող չափանիշների ընդհանուր նկարագիրը սահմանվել է 2013 թվականի հունիսի 6-ի N 598-Ն որոշմամբ, որը նախատեսված էր ՀՀ կրթության և գիտության նախարարության աշխատակազմի կրթության պետական տեսչության համար և ուժը կորցրած է: